

栗香五筆

栗香五筆卷七目錄

徐鼎臣臨碣石頌

華陽國志佚文

元公姬夫人志

淵禪師塋像記

壽聖院莊田記

壽聖院泛海觀音記

紹興復江陰軍碑

胡氏墓志

珠珍寶塔記

潮陽文信國公詞

毘陵見聞隨筆

同善會

閻陳二公祠詩

冰雪吟

南田詞

疏快軒詞

自怡詩集

采石醉詩圖卷題詩

丁學士小影題詞

丁汀鷺大令詞

南湖詩詞

天弢閣詩

催粧詩

金匱兩女史詩

紫琅玕院遺稿

粟香五筆卷七

江陰 金武祥 註生

宋徐鼎臣臨秦賜石頌

皇帝建國德并諸侯初平泰壹卅有二年軻登碣石  
照臨四極從臣羣作上頌高號爰念休烈戎臣奮威  
遂興師旅大逆滅息武殄暴強文復無罪庶心咸服  
惠論功勞恩肥土域賞及牛馬墮壞城郭決通川防  
夷去險阻地勢既定黔首無繇天下咸撫男樂其疇

女脩其業事各有序惠被諸產久竝來田莫不安所  
羣臣誦略請刻此石垂著儀巨皇帝曰金石刻盡始  
皇帝所爲也今襲號而金石刻辭不稱始皇帝其於  
久遠也如後嗣爲之者不稱成功盛德丞相臣斯臣  
去疾御史大夫臣德昧死言臣請具刻詔書今刻石  
因明白矣臣昧死請制曰可

端拱元年春三月銀青光祿大夫守右散騎常侍

上柱國東海縣開國子食五百戶

臣

徐鉉奉敕臨

楷書

小字

孔昭孔識云右徐散騎真蹟一陝客董姓攜來售

者因價昂留觀一宿鉤出還之後有柳文肅貫跋

趙文敏

孟頫

揭文安

奚斯

觀款危學士

素

跋文待

詔徵明

隸書跋均不及鉤且不及鈔出以存攷據

爲可惜耳嘉慶癸酉夏六月

吳儁識云秦燭石頌二百一十字宋徐鉉所臨江

陰孔昭孔雙鉤本也同治乙丑正月得於華野舊

東坡全集 卷一  
書肆乾嘉時布衣孔瑤山先生者自長壽鎮遷居  
華墅之沙山敦行好古精究六書著有說文疑疑  
稱於士林一日遊城市見漢銅印一方曰孔千秋  
愛不能釋解襍被易之歸遂自名千秋又得奇石  
尺許巒壑甚美文徵仲署刻瑤山二字其上因自  
號瑤山其刻石與俗工異畢氏經訓堂帖多出其  
手以鐵筆世其業子爲昭孔號味茗孫憲三字省  
吾余故友也省吾之子曰慶壽爲申耆先生弟子

有聲庠序早世庚申劫後一家被難丙寅冬常熟  
楊詠春觀察旋里見碣石頌以爲希世之寶亟序  
而刻之播之於世觀察與孔氏亦世交也憫孔氏  
無傳人故詳其顛末云丁卯春仲

楊沂孫書後畧云秦小篆之見於今者惟泰山琅  
邪兩石刻數十字而已嶧山碑文雖全而轉相摹  
仿失其真意世所傳之小篆不知與秦類乎其不  
類乎每讀史記所載始皇登封諸石刻徒望古遐



想而已子重吳君示我闕后頌全文雙鉤本雖出  
於徐鼎臣之臨摹孔昭孔之雙鉤在當時必有后  
本可據宋初君臣知其希有故特命臨寫以視嶧  
山碑之轉相摹仿者大有逕庭且史公當日記載  
其文未全韻句多舛此則整齊完備作於始皇而  
刻於二世昭然可攷同治六年四月

武祥按嚴可均輯全秦文闕后門刻后據史記秦  
始皇紀錄之而以爲上脫九句不知所見何本史

記初一泰平嚴輯注云當作泰字以叶三句爲韻  
亦未知所據何本徐臨初平泰壹在首第三句爲  
韻文義較順大逆史記作爲逆暴強作暴逆黔首  
作黎庶誦畧作誦烈儀巨作儀矩

武祥又按史記秦始皇帝行幸天下凡六刻石及  
二世立又刻詔書於其旁今所存者惟琅邪臺刻  
石存八十餘字泰山石刻乾隆五年燬於火拓本  
存者有廿九字本又有殘石十字本嶧山石刻宋

淳化四年鄭文寶得徐鉉摹本刻之長安翻本有  
七而以長安爲第一文寶謂鉉晚年所獲得思於  
天人之際者也此本亦鼎臣所摹楊濠叟所謂漢  
唐至今諸好古者未經著錄之名篇天下古今無  
二本之奇迹獨於兵火銷殘荒邱寂寞之地遇之  
豈非文字之大幸而顯晦有時歟濠叟深於金石  
者其歎賞如此嶧山碑云窺輶遠方金石遺文錄  
以爲輶卽巡字琅邪臺碑五大夫作夫夫金石錄

以爲古人簡質凡字點畫相近及音同者多假借用之東漢時碑刻尙多如此

### 華陽國志佚文

華陽國志以鄰水廖都轉寅校刻本爲最善不減宋元佳刻粵燹後中有脫板五十餘篇近李鐵船觀察得之亦鄰水大爲補刻完好傳世六七十年轉徙一萬餘里楚弓獲反亦藝林勝事乙未春以書見贈冊後陶心雲孝廉爲補錄佚文一條余觀北堂書鈔太

平御覽尙有此書佚文五條因識於此并錄示鐵船  
補刊焉陶補張翥及今所載郝伯都皆在所闕巴郡  
士女五十四人之內其趙閑慶鴻荀崧女王廣女未  
能定應補何卷知此書佚文尙不少也

趙閑讀書一見便誦聞人讀書自識章句

書鈔卷  
九十八

郝伯都閩中人爲郡吏太守每見之垂泣伯都請白  
其故太守曰亡男爲人所殺汝身似之故悲感伯都  
問其讐所在太守曰臺閣不可得也伯都乃交游與

甘春卿爲友共伺讐殺之於車府而亡命春卿爲吏

所得伯都乃還首二人爭死會赦得免

書鈔卷百三十九

洛陽慶鴻慷慨好義廉范與爲刎頸之交時人稱曰

前有管鮑後有慶廉

御覽卷四百九

荀崧小女灌幼有奇節崧爲襄城太守爲杜曾所圍力弱食盡欲投於故吏平南將軍石覽計無所出灌時年十三乃率勇士數十人踰城突圍夜出賊追甚急灌督厲將士且戰且前後得入魯陽山獲免得向

覽乞師又爲松書與南中郎將周訪仍結弟兄訪卽遣子撫率三千人會石覽俱救松賊聞兵至散走灌之力也

御覽五百十九

王廣女美姿容性慷慨有丈夫之節廣仕劉聰爲西揚州刺史蠻梅芳攻陷揚州廣被殺女年十五芳納之於閨室中擊芳不中芳曰何故反女曰蠻畜我誅父賊吾聞之父讐不同天母讐不同地汝逆害人父母復以無禮凌人吾所以不死者欲誅汝爾所恨不

得梟汝首於通衢以塞大恥乃自殺

御覽卷五百十九

### 元公姬夫人墓誌

隋元太僕志闕二百九十二字 志中聖主誤作聖  
士餘梁誤作餘梁焄蒿誤作君蒿

姬夫人志闕四十九字 志中蕙性誤作蕙姓禮婦  
人不畫哭畫字誤刻

右二志石在西安嘉慶二十年始出土爲吾郡陸  
劭文徵君所得假朱撫部兩健騾負石以南江左



遂多搨本清儀閣題識及金石續編考据詳賅更  
無贗義何子貞編修至形諸詩翰其珍閱舊矣石  
旣歸毘陵咸豐庚申之亂石爲賊擊中斷後陸氏  
子孫以白金五十兩質諸邑人其人聞陸將贖歸  
乃於一日夜以火烘搨百餘紙石又多泐損現爲  
惲氏靜園主人所得

隋書之精整者如常醜奴惠雲法師修勁者如甯  
質蘇孝慈淳于儉張貴男疏朗者如鞏賓宋永貴

而風力奇高神采古秀當以董美人爲劇迹此二  
志雖遜一籌而逋峭入古實爲歐虞所從出六朝  
書格若出一揆初唐石墨如龐二哥舒懿公諸志  
尙未大變自率更永興河南顏柳各分書派而古  
格無存包世臣斷爲率更書不知隋碑固有此格  
傾已

姬志書體端逸雖與元志如出一手而超妙過之  
惟姬志云天和四年六月旃拜建甯國夫人證以

元志以軍功封豫州之建甯男則在宣政元年相距十年無豫封其夫人之例書撰并出一時之手而兩志年月迥異舛錯顯然好事如劭文叔未諸君均未之考見何也

據北史周隋西魏書及元和姓纂考之元太僕爲司徒樂平王元最字壽興之子名亶者誌闕諱空格下僅著一字曰智亶智義台此與子孫名位當以姓纂補之

夫人姬氏先太僕三十九年而卒案姬氏東郡神水三世史皆無傳魏書北史竝載姬澹字世雅信義將軍樓煩侯以勇績著名桓帝穆帝並見委任埒見衛操列傳或卽東郡之先歟

武祥按元姬二志考證爲劉君光珊郵示足補陸張所未及因備錄之

淵禪師塱像記

常州江陰縣壽聖淵禪師塱像記 通仕郎新授滁

州全椒縣令管句學事管句勸農公事孫冲撰

禪師姓董氏名海淵開封人生不茹葷九歲侍其  
親官瀟湘指雲蓋山曰吾舊居境界願割天屬愛  
而棲遲焉清已師摩其頂曰法器也其親以已有  
德使依之慶厯二年貢乾元祝壽疏被恩剌染及  
游廬阜遇暹公謂同志曰海上橫行是此老子遂  
袒肩作禮旣傳其妙卽去而暹公送之以偈云六  
年止開先三載爲侍者此日下層巒但慮知音寡

爾本簪纓族來入金僊社立雪幾忘形問心已閑  
暇草木如今處處青靈雲謾說桃花謝時江陰壽  
聖初構吾祖施金應寫貝文秘諸巨屋師至視籤  
目笑曰復爲觸腮蠅爾與夫用心而他者有閒故  
首尾飫讀番次不知其幾客至與語不及世務唯  
諸法因緣而已壽聖法席偶虛欲得善知識者主  
焉元豐直講王彥魯沈之與先人莫逆每日有人  
韞匱妙寶而光彩自昭如淵禪客者是已邑中長

者咸譽其行先人狀諸有司三命而師方從之臨

江何公

正臣

自侍從帥金陵念于渭陽將以大剎

駐其錫師雖往曰吾視身猶蛻此大而彼小孰區  
別耶舟還浮玉佛印元老指師如左右手乃會于  
妙高臺表元曰別後何所得師曰相見又無事元  
曰太徹骨也師曰不來還憶君元將修供款曲無  
生話遽聞琴音亟視之而一葉已夷猶於中冷元  
謂其人曰吾與伊人同燈分焰宜有契分其忘情

尙爾況於金陵乎貴人有問寃結解以何術師曰  
胃中無累焉用解爲宰者以暴很服民羣小負炎  
而蟻聚僧居壽聖最爲冗地烹鱗烙毛晝踐夜喧  
衆莫敢議或請師誨師曰惟鱗惟毛從善人所惡  
中來一烹一烙蓋其分也負炎者悟往往跪謝鼠  
盜劫衣以刃刺師口師齧刃不怖盜畏躡足而去  
衆駭以視然猶定而不傷或問其故師曰吾疑夢  
也且師定所蚊蚋獨無晚年竟夜無睡弟子窺之



俄有扣關者師啟扉而白衣並拜曰久事左右喜  
無過師予之茗而辭明日師語其衆曰吾來四十  
三年而代者隨至吾倦矣止欲盈尺之地以宴寂  
無恆吾化諸兄

沂天與津

以師爲先人友見師數

告休而衆亦不能強卽奉于西堂等覺源師故自  
晉陵從請遂升法席師曰之子吾知其來源之生  
是師初解包日雲門纔遊方而敏公知之事幾類  
此未幾澡身換衣結跏于牀適持戒者饋饌師食

竟操筆書四句偈嗒爾而化實大觀十年十月二十八日得壽八十四後七日善男子以香木五百斤火于君山之陽師平居下視雖與人語而首不舉及化也面若對物至焰觸龕裂則如如不動豈古人所謂骨强者歟諸年少競指其腹云此破必穢聞道家尤忌引去是宜已而風旋烟撲其氣芬馥如芝蘭然觀者合爪斂灰之日不壞者三齒舌睛爾衆得堅固子無不滿意至有紅色舍利如豆

者焉善男子不忍流其灰請和以香泥爲師像像  
成而其徒惠宗等錄其行俾冲記且冲仕進不以  
文目笑於輦俗設勉力爲書奚使人信雖然夙奉  
遺訓目擊紙上語酷好爲古言求諸已固無歉今  
邑中豪傑不少屈彼大手筆當信於後人冲請辭  
惠宗曰先德與師猶令之於遠公也子念先德毋  
拒我冲三復之不敢拒於是作記贊曰 維道與  
貌天與形 形貌與吾非實相 旣返太虛離諸

妄 云何卽妄復求真 欲認爲真惑愈深 諸

佛應須偷眼笑 彼美莊嚴三十二 不是如來

妙色身 苟非如是現衆生 安得羣盲剗病膜

是故邑中善男子 塑香成像擬自然 滿阬

滿谷儻可尋 當卽有靈同見在 我今洗滌身

口意 頂禮壽聖淵禪師 然燈爲燭淨土容

願此慧光長不滅 小師惠宗 惠澄

句當立石惠河 典座沙門慶才 維那沙門惠

則 監院沙門海潛 首座禪鑑大師正自住  
持傳法賜紫等覺大師秘源

大觀三年十月二十三日練江居士孫沂奉母親  
唐氏命立石 毘陵潘震同男允升刊

壽聖院莊田記

常州江陰縣壽聖禪院莊田記

宋皇祐五年秋大父瑞安府君與四明僧楚祥游  
一日謂祥曰吾邑梵宇皆律居擬建廣廈爲禪林

屈師肇祖可乎祥曰唯卽發黃金廩粟立木百楹  
書貝文幾萬卷雄冠吳楚齋蔬用度靡弗周給其  
徒洞偕董是役祥歸鄞江傳席于偕遇治平詔音  
錫壽聖額大父不幸捐館偕與先君議置膏壤王  
母李氏悅聞樂傾奩蓄買良田數拾畦施供其衆  
歲在熙甯偕如雲崑有海淵續燈厥後逮崇甯末  
因祥符院以泛海觀音訟令仇命淵遷像在茲土  
庶咸稱昌隆之可俟淵休居覲勢薦者八九人衆

議不允時等覺大師秘源主法席居青城予欲召之素書諸名俱授密器取決於泛海前三闕而皆得源僉曰然誠慰所望大觀初夏四月果趨予請源來未久弊陋鼎新稚老欽崇縑流雲會旣安之以中匱彌憂念茲乃懷四年春縣西舜城近事何瑕造丈室願將已疇平裂奉施迺曰身猶夢幻物如泡影此固無恡輒惠書契逕具情陳于公而田畝之數伍伯伍拾以其季七月十二日大會僧俗

伸慶懣焉嗚呼吾祖基肯構者惟我先君或謂功德竭出一家尤慳小惠獨何君良悟世諦卓然特達豈隆殺之理各有時歟得非源之善化而符合致此歟抑亦衆力之贊而成其美歟固知興衰之自然非人之所能爲也鄉黨傳爲盛事源乞記於沂欲述祖構之因遂從其請政和元年重陽日練江居士孫沂記男蒨書

莊主沙門

道俊

浴主沙門

慶才



藏主沙門

靜瑞

典座沙門

道初

維那賜紫沙門

惠則

監院賜紫沙門

宗僅

首座禪大師

正自

侍僧覺齋

秘源

立石

梁溪邵詳刊

壽聖院泛海觀音記

常州江陰縣壽聖院泛海靈感觀音記

菩薩於天聖元年三月中泛大海至於江陰有客  
舟邂逅菩薩於中流隨船放光而行舟師以篙枝

退如是者三放光不已相次至江岸小石灣住彼  
不去是夜現白衣人託夢於邑人吳信云緣化右  
臂信曰臂實難捨餘可奉從白衣人曰此邑雜賣  
李氏家有香檀可以作臂信候天明驚異尋之有  
市人相傳江岸有觀音泛海而來其長及丈信往  
視之果見菩薩仍無右臂於是信宣言於衆曰菩  
薩託夢檀求此臂我今發心圓滿功德後果得檀  
木於李氏家長五尺許乃能成就自是邑人迎請

歸壽聖奉安廣興供養祈禱屢獲感應宣和甲辰  
二月二十二日孝竭被旨按兵同常倅王松抵是  
邑暫憩壽聖遂獲瞻禮時長老祕源持菩薩示跡  
請記本末庶幾見聞發心歸嚮夫大士應願滿心  
令諸有情獲安樂地隨緣赴感現六神通以妙智  
力使彼衆生觀其音聲而得解脫應得度者卽現  
其身此亦瀕江近海大士度人應世悲願之一也  
王孝竭稽首爲記以書事實

紹興復江陰軍指揮碑

紹興復軍指揮

兩浙路轉運司準紹興三十一年五月十四日勅

部狀

江府林安宅

被旨暫

江府事兼領提督海船詢究

江陰利害自廢軍之後全無裨補

江

歲虧欠上供諸色錢一十餘萬貫文及江陰知

縣丞曹總

右州軍例皆殘破

實賴再復軍額駐兵馬守禦得以保全軍須之

時辦

輻輳戶口增盈民樂其業本軍

合辦朝廷歲計官兵衣糧

後來改軍爲

縣廢罷場務客販不通居民失業流徙他本

縣夏

監錢

舊爲軍日均於客戶送納廢

軍之後人烟稀少所虧之數均及比之舊年增

加錢數民受其害兼爲之禁地旣蹙客旅蕭

疏酒稅課利虧失元額連欠上供諸色錢數至多

無從椿辦

舊復爲軍額本部看詳欲下逐司

詳本官所乞同共相度如委是經久可行利便卽  
保奏施行三省同奉 聖旨依戶部看詳到事理  
施行本司今契勘江陰昨爲軍日贍養本軍官兵  
椿辦 朝廷歲計每年三十 七百二十九

貫三百三十九又常年並皆足備卽無拖欠後因  
廢軍爲縣客旅稀少居民失業酒稅虧額自改爲  
縣至今四年已是拖欠上供諸色錢總計四十五

萬九千餘貫文見有案籍照應竊緣財賦正隸漕  
司他司不知詳細兼江陰邊臨大江卽與鎮江府  
一帶聲援相接目今見屯軍馬防禦盜賊最爲浙  
喉襟控緊要之地本司今相度若復爲軍委  
是經久利便伏願朝廷詳酌特降指揮施行伏  
候指揮

建炎復江陰軍指揮碑已著錄於五筆卷三矣  
近又得紹興復軍搨本蓋是碑卽刻建炎碑陰

嵌置牆壁間碑陰向屋內久無知者碑亦兩層  
刻額正書批答行書牒正書十六行宋紹興三  
十一年五月十四日牒當與建炎碑同爲陳鑄  
所摹刻者按江陰軍先復於建炎四年紹興二  
十七年復廢爲縣厯四年至三十一年又復爲  
軍此碑所載是也建炎碑則重江海要害此碑  
則重財賦其詞各有不同而文字漫漶多不可  
辨蓋碑陰在屋爲人磨損耳



胡氏墓銘

宋壽昌縣君胡氏墓銘

校理旣又以其兄子之子歸鉛山於是遂爲世姻而壽昌與校理之夫人以姑姪爲婦姑凡吾周氏之族皆曰鉛山夫人之賢似吾校理夫人之賢蓋其爲胡氏也保傅之訓戒者相若也爲周氏也姑婦之詔聽者相若也故以其所爲女事爲婦事而周氏之爲婦道者皆曰是爲婦足法也以其所以

爲婦事者爲母事而周氏之爲母道者皆曰是爲  
母足法也嗚呼女子之行不出於閭擬人之善莫  
如其親是所以書也所以信也壽昌蓋以夫登朝  
封爲邑君享年五十有七生男子五人成已祖已  
審已求已愼已皆舉進士女子三人長適晉陵胡  
璿次適高沙李材次許嫁姑蘇徐孝廣孫女一人  
銘曰生有訓歸有詔婦是則母是劬惟壽祿彼覆  
燾訂來者祝豐報

繆筱珊太史得是石以搨本並跋寄贈云宋壽昌  
縣君胡氏墓志志正書額篆書光緒丙申出於予  
家迤北濱江里許田中蓋志完好無缺以今尺度  
之高廣各二尺二寸同時耕人得覩一椀一水注  
一墨一均爲人所攫去互相傳說以爲得窖幾成  
獄訟志亦屢埋屢培又爲人剖志之半以去予囑  
族弟晉初致之家爲搨其文字跡圓勁文亦有法  
惜僅存下半撰人年月均不存但聞人云元祐年

而已畧可考者縣君胡氏歸於周鉛山君其姑歸  
於鉛山君之父校理君以姑姪爲婦姑其賢相似  
子成已祖已審已求已慎已皆舉進士考宋職官  
志云祕閣有校理以京朝官充之通掌閣事掌繕  
寫祕閣所藏元祐初復置直集賢院校理敘封云  
庶子少卿監司業郎中京府少尹赤縣令少詹事  
諭德將軍刺史下都督下都護家令率更令僕母  
封縣太君妻封縣君周君蓋官鉛山令妻應封縣

君與志正合宋地理志鉛山屬江南東路信州壽  
昌屬兩浙東路建德府均中子五人不見縣志其  
舉進士而未第者與吾邑金石最少又得宋志一  
種足爲志乘光倘覓得志石上半能爲延平之合  
其可考者當不止此繆荃孫跋

珠珍寶塔記

珠珍寶塔潁川郡記

大元國浙西道江陰州良信鄉墓東和衆里茅司

徒大王界內本境士庶昨於至大年間崇建佛會  
蒙吳仲良喜捨塔基一所坐落村內新造觀音佛  
塔及當境祠下每年舊有上元令節法華妙典祈  
恩請福新剏六月十九日白衣大士示相之辰金  
剛經文各立疏首輪流承當切見所用不敷伏承  
信士陳旺同妻鈕氏同男普明孫男女等發心將  
到本鄉五都九保劍字五百八合號內良  
田肆畝坐落城溝東東西朱南王北溝元各白米

三石二斗夏麥四斗佃自願恐時年荒儉退作二石並無水旱資助疏首作福費用永爲常例喜抬其田請衆商議另各過割至期疏首前來本家支取卽無推故倘有人過佃毋言增減收支種主照依田帖辦納稅糧諸人並無欺冒仰祈喜利上祝皇圖永固帝道遐昌佛日增輝法輪常轉上報四恩下資三有法界冤親齊登淨域子孫代代鎡鋌廣祖禰程程快樂多恭維三寶證明檀越亡者阿

彌陀經二十四卷香燭銀錢淨食經疏之儀龍天  
洞鑒歲次乙亥元統二年七月中元吉日謹誌緣  
事吳祐之男大成刻字金福明

右碑額八字橫列記十六行均正書不著撰人  
名字以今尺度之高三尺廣一尺八寸有奇在  
前周鎮墓東社廟中塔無存而碑石完好記文  
瑣陋以近在鄉里且足正縣志以前周鎮爲音  
永陵鄉之誤特全錄之



潮陽東山文信國詞

余已卯仲夏于役潮陽縣游東山之勝有雲厓水仙祠簾泉亭流觴曲水諸處觀明人磨厓所刻風壑雲泉及觀海大字山下有雙忠廟未暇往也後庚寅歲劉子占大令權潮陽錄示雙忠祠有文信國題壁沁園春詞相傳公以劍鋒劃石壁字體如鐵線盤屈諦視始辨後人恐其日久就湮復於旁立一石大書深刻以便讀者詞云爲子死孝爲臣死忠死又何妨自

光岳氣分士無全節君臣義缺誰負剛腸罵賊張巡  
愛君許遠畱取聲名萬古香後來者無二公之操百  
鍊之鋼嗟哉人生翕歛云亡好烈烈轟轟做一場  
使當時賣國甘心降虜受人唾罵安得流芳古廟幽  
沈遺容儼雅枯木寒鴉幾夕陽郵亭下有奸雄過此  
仔細思量子占井云此詞選入元草堂詩餘題爲至  
元間畱燕山作詞內張巡二字作睢陽又無嗟哉二  
字攷諸志林云元潮州路總管王用文跋稱公此詞

蓋在景炎時道經潮陽謁張許二公廟作而續資治  
通鑑舉要乃載之畱燕山時所爲及攷公所著指南  
後錄中多在燕諸作皆無此詞則係於潮陽明矣況  
用文時去公未遠所言當確如謂在燕京作應在已  
庚辛壬之歲宋亡已久何所據而移爲景炎時耶續  
通鑑舉要當承元草堂詩餘之誤也詞云古廟幽沈  
遺容儼雅其爲謁廟所作甚明詩餘但注至元間畱  
燕山作雖燕山有無張許廟未可知然不注明謁廟

則詞爲不切矣此可正續通鑒舉要之誤不但詞內  
第二段首句八字足補詞譜之缺而已余按翁覃溪  
粵東金石畧及阮文達廣東通志均載此詞嗟哉二  
字阮有而翁無均以爲在潮州吳文正韓山書院記  
碑陰明萬厯間章邦翰重立是翁阮二公亦未知潮  
陽之有劍鋒所劃矣

毘陵見聞隨筆

吾常雍乾間趙豹三先生彪詔仕蜀有惠政年六十

解組歸擁書自娛留意桑梓故實凡儒先事狀鄉邦  
氏族官府文移閭里謠諺可備稽核者罔不搜討錄  
爲巨編相傳有只可編毘陵見聞隨筆百家詩錄其  
數百冊每冊厚二寸許摺疊粘補纖悉不遺余見蘇  
州李氏有只可編一冊隨筆三冊薛嘉生家亦有隨  
筆十餘冊所謂每冊厚二寸許者亂後蓋所存無多  
矣

同善會

毘陵見聞隨筆載萬厯閒錢啟新同鄉一本同善會錄高忠憲攀龍序之其例歲凡四舉每人齋助自一分至九錢止到者先講聖諭及爲善孝順事實所入之銀助老助貧給棺孝與節加助錄中以第六會四十四分銀十九兩五錢三分爲最多助貧者每人錢一百文至十文不等每錢一千一百十文准銀一兩給棺每具銀三錢每會備茶點銀二錢其錄載至第七會止同鄉之子梅谷司徒春踵行之至順治丁亥

復有陸君自巖重續之乾隆時錢氏之裔服民大令  
人麟宰桐廬縣復推行之想見先輩樂善之誠及當  
日人事之樸均有足傳者

高忠憲每會皆輪助  
九錢序載高子遺書

### 閻陳二公祠詩

江陰乙酉城守推閻陳二公詠其事者自趙甌北味  
辛兩先生後又有馮景亭宮允近沈蒙叔學博寄示  
嘉興戴禮庭明經德堅七古一篇亦足爲後勁也詩  
云開闢已來明季止忠義傳中那有此斗大孤城兩

典史八十一日守一死堂堂閭公真人豪元女劍法  
呂望韜低頭執笏沈下僚悲歌擊節蒼天高江陰城  
上插大鼓江陰城中晝閉戶時公新擢廣南簿陳公  
受事坐堂廡文武鼠竄烽轉急邀公入城籌大敵慷  
慨誓師同戮力部署初定外圍逼北來鐵騎如游龍  
廿四萬衆攻臨衝神機火炮八面轟飛走路絕天地  
紅城中壯士銜枚出誓不反顧頸是鐵間以奇兵風  
雨疾所營夜半溝流血我聞王師東南征八旗兵



到無堅城雄藩巨鎮警先聲降旗四豎壺漿迎獨以  
孤羊抗羣虎要爲高皇留尺土螳臂支撐抑何苦熱  
血淋漓報君父是時八月方中秋闔城食盡神鬼愁  
飽以忠義勝糧餽四明月上猶吳謳且餓且守且挑  
戰民心不變天意變雷雨摧城紅一綫先登將士追  
飛電分頭巷戰勢倉卒殘卒猶堪一當百大呼九廟  
臣力竭一衆英魂隨毅魄吁嗟乎兩公肯以江陰降  
小者通侯大者王美官不爲爲國殤知己惟有許與

張向使當年畫江守兵權得握兩公手主戰主和相  
左右玉龍不向蕪湖走惜哉英雄不遇明社屋大節  
雙雙峙山嶽我來瞻拜薦秋菊荒祠草碧埋遺鏃月  
黑倉茫杜鵑哭

冰雪吟

明末武進諸生張贊虞名以謙隱芙蓉湖著有記事  
珠十卷嘉慶時刊行又有冰雪吟一卷登秦望山望  
江云高秋一望氣悲哉扶杖登山眼暫開萬里江流

京口下千帆風色海門來天清深谷聞樵笛日落寒  
煙鎖戍臺矯首不禁愁思起淒涼況復角聲哀斷句  
如寄安之云乾坤不變孤臣臘日月猶留處士詩趙  
止庵遜跡維揚云燕臺誰和高生筑吳市長吹伍相  
簫書懷云浮萍豈敢隨流水勁草猶能抗疾風弔漢  
虞司直云一世可憐心盡死三綱惟有鬼能扶哀江  
陰云半壁已忘周日月孤城猶見漢旌旗頗似花王

閣集

南田詞

惲南田先生遺詩及畫跋最備於海昌蔣君生沐道光戊戌所刻甌香館集十二卷又卷首卷末兩卷光緒七年武昌書局重刻之余近見周君蕤祉所刻松煙肥廝齋惲帖云得先生手錄詩稿一百七十二首刻成於咸豐甲寅其詩多有出蔣輯之外者內有詞二首尤足爲先生遺著增一種也南唐浣溪紗美人春睡云戶外飛花心乍驚縹緗不度懶調箏倦倚鮫

銷金鴨冷總無情。蝴蝶迷雲隨夢去。桃花倒暈與  
潮生。料得醒來呼婢女。打黃鶯。金浮圖。鳳生畫美人  
倚梅接履。小婢扇底俯拾落梅云。探梅去。寒香映水  
金谷春回。畫堂人起。曉煙深。偏繞花多處。錦石長堤  
曲澗。泉如雨。忽見落英飄樹。迴看扇底脫却紅絲履。  
湘紋住。何曾動步。輕縷行。纔只怕金鉤露紅綃總  
被青苔濕。喚雙環。細拾瑤林霧。還道多折南枝烘暖  
銅餅。莫使風姨如。

疏快軒詞

康熙時無錫陸鐵莊先生名楣字紫宸以布衣擅古文辭近始以集字板排印鐵莊文集八卷疏快軒詩二卷詩餘十四首附於後其金縷曲哭朱子西安云再見斯人否只飄零數行珠玉照人懷袖蝸角虛名磨蝸命多少雨偃風憊剛博得幾年詩酒

薦後被  
誘停試草

草園池生計辦撇鷗盟更續轅駒走聊爾事亦何有歸來三徑花如舊縱長貧肯教冷落翟門師友今

日一揮知已淚不爲綈袍情厚奈寂寞才名身後千  
載心期吾不忘梅五湖有約終相負風乍咽暮濤吼  
其二云漂泊天南久訊征鴻故人何似別時詩瘦爲  
說夢我初廢詠血漬夜臺應透料雞骨那堪長守急  
趁歸航相慰藉素車遲不及颺輪驟空飲恨范張友  
招邀尙記黃花候鎮流連蒲帆夜月竹窗清晝吟  
到傷心千古曲清淚一時盈袖  
嘗共讀永叔銘子美墓輒相對飲泣不自  
知其更齒冷蠅營狗苟我有新詩君未見儘長歌屬  
然也

座還聞否絃已斷臆難剖鐵莊與梁汾同時同邑此  
詞頗似彈指集也

自怡詩集

隨筆卷一首載程霖巖先生呈余五世祖 絅軒公  
七律詩而未見其全集也近閱李申耆先生武陽台  
志文學傳云程景傳字命三年甫冠卽偕兄景伊遊  
學於金絅軒先生之門學日益進屢試報罷以貢  
授宣城訓導教士以敦行爲本年六十歸田徙宅爲



家祠傲居他所平生一以引導後學爲已任多士景  
從如雲掇名者以籍計尤熟於鄉邦掌故修纂邑乘  
咸資考訂性好吟咏年逾八旬猶偕湯銘書汪萍洲  
楊靖叔爲四老同甲會優遊鄉里稱人瑞云著有自  
怡詩集霖巖雜著皆刊行又按程文恭公諱景伊字  
聘三號莘田與余高祖敬齋公唱和甚多著有雲  
塘書屋詩稿十五卷文稿十二卷代言存草二卷

采石酌詩圖卷題詩

湯芷卿饒尹用中以道光己亥舉人就兩淮鹽官有  
養不知齋詩稿經燹不存嘗乞其從叔雨生都督繪  
采石醉詩圖自題七古云謫仙已作騎鯨游青山屹  
立雲悠悠江流拍天日東注惟有明月依舊懸高樓  
樓高百尺豁四面江光嵐翠平檻收岩花灼灼含宿  
雨長松落落盤清秋有時天風卷虛簾髣髴尚有詩  
魂留奈何行客不自量爭來憑弔哦淫謳吳歌嚶嚶  
雜巴唱江神塞耳山靈羞我因多累別鄉里忽復過

此乘扁舟風利只尺不得泊握衣瞻拜無因由一尊  
滿注對江揖青天恍惚垂吟眸曠懷如公不免死苦  
吟亟亟將安求杜陵賀監久寂寞九原難起韓荊州  
安期羨門亦虛誕不如浩蕩隨鳬鷗我願銀濤澈底  
化爲酒枕機便當眠糟邱興來樓下捉明月定與醉  
魄同沈浮縱不能手挽長戈搗白日足攝飛鳥凌滄  
洲會當遍酌此江水一洗萬古詩人愁汪蘅甫方伯  
本銓題云空江浩浩扁舟橫天風吹送吟詩聲錦衣

仙人不可卽恍惚跋浪乘長鯨長鯨在胯月在手酒  
魄詩魂挾月走那不臨風酌一杯椒漿雖薄詩情厚  
以詩侑酒酒酬詩長歌當作迎神辭詩成酩酊伸鬱  
慕今夕慰我長相思回頭忽訝青山笑游蹤未接神  
先到明月來銷過客愁奇詩壓得孤帆峭醺酒含毫  
作畫圖能令過景追亡逋題君行卷會君意酒腸芒  
角詩腸蘇君不見采石磯邊浪千尺過江名士多於  
鯽不解投醪弔古心惡詩空疥詞壇壁丁誦孫學士

嘉葆題云青山鬱嵯峨中有太白墓采石枕江巖云  
公捉月處湯子掛帆過風利不得駐一尊爵當空魂  
兮儻來赴銀雲櫛櫛搖江流靈旗漠漠颺清秋仙人  
縹渺不可卽詩魂酒魂江上樓左揖元暉右浮邱來  
往儻忽如輕鷗錦袍高歌恣豪飲千一百年無此游  
愛公賀知章釋公宋若思生平數知己一一堪揚眉  
兵間獨識郭子儀酒邊意共崔宗之奇才幸未夜郎  
死醉留詩骨埋江湄陽冰繆篆空一世恨不伐石書

豐碑烏乎公靈豈湮沒捉月應隨夜光發仙魂傑住  
廣寒宮我欲酌詩先酌月方伯有宮闈百詠梓行學  
士嘗爲余六世祖孝子公作傳鰈尹有翼駟稗編說  
部頗風行一時此圖爲湯允孫大令所藏鰈尹其叔  
祖也

允孫梓其祖德卿觀察建中筠綠山房詩草四卷詞  
一卷觀察與余從伯曙洲廣文同爲趙甌北先生外  
孫交誼頗摯故有寄懷詩云貧本吾儒慣其如客裏

何問年雙鬢短負累一身多塵海飄蓬梗天涯泣蓼  
莪弔君還自弔應其淚滂沱又哭金曙洲云薄宦頻  
餐苜蓿盤卅年蹭蹬誤儒冠死應仍去爲才鬼生竟  
難留作宰官歸骨無資須友助嘔心有稿待人刊如  
君收局猶如此我在名場膽亦寒

丁學士小影題詞

丁汀驚大令出示其尊人誦孫學士小影取張玉田  
折梅橫挂酒壺歸詞意江陰吳君冠英繪圖仁和戴

文節公熙倚霓裳中序第一題詞云溪橋獨自覓忽  
覺梅花香到骨竹外斜枝漫折拚蠟屐沾春攜歸簾  
隙盈盈脈脈悄自憐今夕何夕銀燈下翠尊重洗小  
坐對花吸 清絕問絳都仙客可能有酒紅花白空  
香搖漾簾席怕醉裏壺天多化香國閬風巔上立望  
玉宇瓊樓霽雪醒來後一天瑤想更向縞衣說錢塘  
吳仲昀制軍振械倚尉遲杯題詞云空山靜恁幾點  
寫出春風影荒苔白石斜陽細覓江南芳信尋幽采



素拚跼足豪情破春冷趁歸禽小徑昏黃一扇微月  
香凝 翛然紙帳銅瓶橫斜好商量位置宜稱無數  
明粧清尊畔渾不是燈窗獨飲平生夢瓊樓玉宇奈  
夢到羅浮蝶難醒便來朝尙殢餘醒踏雲重訪仙境  
長沙羅蘇溪制軍繞典倚夢橫塘題詞云醉眸雲洗  
健步風襲冷香無數吹墮鶴氅神仙不肯任花期忙  
過紅友招來翠衣歌罷半肩花妥寫壺天世界滿紙  
清芬剛容得梅花我 今年踏遍蠻山

時同官  
黔中

儘傾

壺百醉壓擔千朵餞別花前還屬與小詩題和一彈  
指羅浮夢短晝裏人先隔青瑣淚灑黃壚更從何處  
問梅花因果蓋學士於道光戊申六月歿於貴州思  
南試院羅詞於歿後補題也

羅制軍時爲黔藩並有挽聯云簪筆侍三天謫仙人  
秉節南來似經萬里夜郎聽鶯小住鋒車馳六月選  
佛地乘雲西去空望千年華表化鶴歸來其時黔撫  
爲喬簡齋中丞用遷亦挽聯云記百花生日餞別禪

關祇今敬禮文存空間首飛鴻雪裏擬六月息時重  
歸瑣院忽報令威羽化更傷心來鶴樓頭蓋黔垣學  
使署有來鶴樓云

丁汀鷺大令

丁汀鷺大令紹基淵源家學服官燕冀有循吏風歸  
田後宦況清貧蕭然自得余自粵旋里時與爲文酒  
之會曾贈以詩中兩聯云且喜清風同不染得交白  
首未爲遲累傳桓氏能稽古一笑坡公不合宜君閱

之甚喜口占和章歿後遺稿散佚令子夢輿孝廉出  
示和韻詞數首錄高陽臺和陳德生韻云紅綻梅肥  
綠侵竹瘦小窗午夢惺忪倦眼慵開不知妝鏡塵封  
無言悄傍闌干立甚新來弱不禁風最銷魂病酒懨  
懨小別怱怱相逢何處曾相識認樓頭翠袖柳外  
青驄一樣颺零更番秋燕春鴻重來事事堪惆悵正  
庭前綠樹陰濃聽芭蕉夜雨瀟瀟滴向愁中

和韻詞錄中爲陳德生

亮疇

陸廣敷

爾熙

兩太史丁

佛持

承壽

大令之作三君皆舊識遺稿均未之見爲

各錄一首陳原唱云瞥眼光陰傷心院宇芳魂別樣  
惺忪劉阮歸來不知洞口苔封尋常草綠王孫怨到  
而今恨煞東風最難堪客裏情懷鞭影怱怱 章臺

柳挽行人住況塵飛不到穩繁花驄同是天涯何須  
夢逐征鴻相思只道隨流水甚花時還比春濃算人  
間萬事浮雲且盡杯中陸和云昨夜星辰五更鐘鼓  
覺來依舊惺忪曾說蓬山當時早是雲封而今好夢

都難覓倚闌干錯怨東風黯銷魂芳草年年流水恩  
恩雲英飄泊司勳老記樓頭彩鳳陌上花驄無意  
成書空教目斷飛鴻天涯何限愁何限甚春歸偏是  
情濃莫關心綠樹陰邊曉鳩聲中丁和云香篆簾櫳  
夢回庭院起來猶是惺忪記得前遊如今都被雲封  
離愁別恨知多少況禁他雨雨風風怪無端春去秋  
來駒影恩恩西湖往事難重省憶橋邊畫舫隄上  
游驄極目雲天何時認取泥鴻歸來堪笑仍爲客但

新添兩鬢霜濃且休題人面桃花舊日門中皆辛酉  
夏日流寓瓢城酬唱之作也

南湖詩詞

金匱張佩之大令應蘭道光癸卯舉人以知縣在直  
隸軍營殉難奉母以孝歿於王事至性純篤而辭尚  
側豔有南湖詩詞草詩僅二十餘首詞五首而已汪  
孟慈太守招集小南海卽席次龍眠山人韻云招提  
積水生微涼入門但聞荷葉香闌干前後夾明鏡戲

魚宛宛波中央懷州太守東坡亞日夕憂民禱秋稼  
平疇旣雨新綠盈乍挈賓朋飲休暇不煩絲竹羅長  
筵碧筒行酒催擊鮮孤花如雪渺烟際坐對咫尺生  
清妍龍眠丈人發高唱主人驩然衆賓暢世途變態  
任紛紜吾輩襟期還跌宕氣誼苔岑只一家人生良  
會各天涯酒闌却憶溪湖道蕩槳秋風白藕花中州  
移家云頻年載酒游河朔忽傍香臺借屋居銅雀經  
秋攜寶硯鏡鸞和月卸香車卧漳孰問劉楨疾寄鄰



徒傭王粲書，賴有清娛能慰藉。明燈擁髻菊花初，舊  
題女郎衫袖云。唾碧春迴紺袖長，頰雲三角倚新粧。  
麝囊花底吹笙坐，試遍迦陵十種香。香南雪北見應  
稀，光碧玲瓏掩玉扉。聞說麻姑年正少，綵紅蟠字作  
仙衣。金縷曲乞兒獨醉圖爲寶，應王岑塘作云。行遍  
天涯脚問何如，醉鄉獨往解衣盤礴吳市簫聲聽未  
已。吹得愁雲滿郭，算塵世眞同糟粕。一笑壺中明月  
上，任興酣拔劍王郎所恣游。戲丹青托臨風却唱

貧兒樂溯當年通侯門第歌姬院落一例清狂客掉  
臂不受嗟來輕薄更別有枯腸芒角只乞中山千日  
酒便抵他畫像凌烟閣歸去也揚州鶴

天弢閣詩

李經畦明經績學工詩頻歲往還頗多唱和近出示  
其長兄佩宜司馬寶翰天弢閣詩四卷佩宜懷才未  
遇以丞倅需次直隸年甫四十卒其詩排塞磊落喜  
效兩當荒年謠云破屋拆作薪薪盡屋亦壞破絮縫

作衣衣敝絮先敗北風獵獵吹草枯饑腸宛轉鳴轆  
轤大兒僵卧小兒哭支離瘦骨無完襦提攜襁負出  
門去茫茫四野皆窮途嗚呼茫茫四顧皆窮途村村  
榛莽成邱墟又云少壯出門去乞食衢路隅道逢行  
旅人挽舟與牽車舟行一何遲河干風雪安所之車  
行一何速驅走直以身代畜嗟來但爲一甌粥忍饑  
去作道旁哭書感云寂寞年華感索居愁心難仗酒  
消除依人未免猪肝累知己空勞雁足書名士謀生

原落扣儒生作計本迂疏一編且息窮途感濁世何  
須問毀譽旅夜夢亡室云夜雨鈴聲慣斷腸獨居愁  
思滿空牀人間已分良緣絕夢裏翻期後會長塵世  
百年終其穴旅魂一夕可還鄉歡娛俄頃成悲感枕  
畔瑩然漬淚光斷句如五言書憤云設施無黃金豪  
傑且狼狽憶亡室云縱達平安書反覆生憂疑校唐  
子山遺詩云此別真千古斯才豈百年呈高麗中先  
生云著書名寂寞去國涕縱橫骨肉罹憂患干戈歷

死生始還常州云滄桑餘劫火喬木起蒼烟七言送

春詞云逝水年華得幾時斷腸人已天涯老感事云

捷書封奏侈戰伐紙上颯颯生英風琴隱歌云爨下

桐焦韻更長釜中豆泣情如訴琴隱以昆弟競贈通產乃抱琴出遊

叔云千秋風雅矜流傳始信盛名出貧賤歲暮云客

久渾忘風俗異家貧惟望歲時豐元旦云家餘舊釀

尊常滿門寫新題句自裁書感云文章隨俗成虛器

笑罵由人信好官呈族祖信夫先生云門巷烏衣陳

迹盡鄉關白首舊交多悼亡云傷心垂死沈疴急猶  
寄平安慰遠人

催妝詩

如皋冒鶴亭年二十舉賢書出瑞安黃叔容太史門  
下遂以女妻之其同歲生太倉姚柳坪孝廉鵬圖爲  
賦催妝詩云閒居無一事手校玉臺詞忽有文鴛訊  
來徵却扇詩永嘉好山色水繪舊襟期爲寫生花筆  
沈沈有所思春光二三月記上孝廉船共有狂生譽

齊名抗議篇良時櫻筍餞歸路荔支天金屋圍鑪夜  
端應憶舊緣奮衣博士席噉餅太原牀青眼文章貴  
紅絲姓氏香乘龍得伉儷立雪笑荒唐如此齊年友  
風流壓輩行春色上梅梢佳人正翠翹畫眉晨顰筆  
擲笛夜吹簫此景君須惜人言客正嬌房中奏新樂  
我亦附瑤瑤催妝詩難得不俗如此聞柳坪亦年少  
多才云

鶴亭名廣生爲巢民先生族孫其生日適與之同爲

韓年譜並刻樸巢詩選鶴亭大父行均仕粵中與余  
同官其伯祖哲齋太守於癸巳秋重晤秣陵白鬚飄  
然承贈詩云忽忽十年別何來空谷音料知宏著作  
遮莫論升沈海國身猶健霜華鬢易侵白雲起天末  
出岫望爲霖余次韻答之云水繪昔名勝風流今嗣  
音一江自洞溯十載悵浮沈獨有林居樂都無俗慮  
侵難忘五嶺外頌遍使君霖

金匱兩女史詩



鄒壯節公鳴鶴有女名佩蘭適華若汀太守蘅芳年  
四十卒若汀爲梓其紉餘小草病起漫賦云堆牀重  
理讀殘書結習從今悔未除借酒澆愁能幾許問花  
解語欲何如身同楊柳眠還起心似芭蕉卷未舒十  
二碧欄慵倚處自憐清影照涼蟬丙寅送別云日易  
斜暉月易昏天涯底事問王孫請看一碧東風裏春  
草春波總斷魂序謂其善病工愁哀怨之什居多皆  
此類也然詠古之作則又豪宕可喜金陵懷古云龍

蟠虎踞鎮金湯六代銷沈幾戰場詞賦有人餘感慨  
江山終古閱興亡西州門外空青草東冶亭邊又夕  
陽太息前朝宮寢地而今瓦礫卧牛羊

鄧式如太守之配沈湘之女史名英好吟詠兼通岐  
黃故有多病能教漸悟醫之句歿後其甥杜子撫孝  
廉爲梓其望月軒詩詞哭居佩徵妹云曇花一現鏡  
中身此夜瑤池返玉真太息明珠沈碧海不堪老淚  
哭青春金蘭苦憶生前契香火徒參世外音日暮靈

蹤何處是幾回愁絕斷腸人題採花圖云金鈴無術  
繫芳華折向東風暗自嗟付與奚奴好珍重須知儂  
亦可憐花贈吳建之妹云早歲清名誇道蘊前生慧  
業證如來送程子干表妹云酒可銷愁拌盡醉詩緣  
寫意不求工寄小姑云別後容光窺鏡老覺來情事  
對燈昏送三子應京兆試云長風萬里征人志一日  
三秋慈母心

紫琅玕院遺稿

曾文正公有女名紀燿字仲瓊適陳岱雲太守之子  
陳松生部郎光緒間偕其夫隨兄劼剛侍郎出使英  
法旋歿於西洋旅次松生發其篋篋得所爲紫琅玕  
院遺稿二十篇刻之月夜憶淑懿誦芬及諸妹云開  
軒望園圃皎月照樓臺微風送琴聲聽之起徘徊美  
人隔秋水欲往張遡洄俯仰情抑鬱遣懷聊舉杯杯  
盡亦已醉結衷若爲開聚散人之常何乃苦縈迴聚  
固深所願散亦無可哀恍然悟此理萬里無纖埃侍

郎識語以爲雋永之言居然可誦此其一也